

6. gr.

Tekjum sjóðsins skal varið til að fegra og prýða húsakynni skólans, til verðlauna handa nemendum, til að standa straum af gestamóttöku (fyrirlesara og heiðursboðsgesta), svo og til hvers, er gera má skólavistina fjölbreytilegri og meira aðlaðandi fyrir nemendur, og til þess að skólinn fái sem bezt rækt menningarhlutverk sitt.

7. gr.

Með þessari skipulagsskrá er Skipulagsskrá fyrir Skólasjóð Gagnfræðaskólans á Akureyri, staðfest 14. maí 1910, úr gildi numin.

2. maí 1968.

Nr. 129.

Staðfesting forsetans á skipulagsskrá um Minningarsjóð Kjartans B. Kjartanssonar, útgefin á venjulegan hátt að mandatum, af dómsmálaráðherra, 2. maí 1968.

Skipulagsskráin er þannig:

SKIPULAGSSKRÁ

um Minningarsjóð Kjartans B. Kjartanssonar.

Kjartan Birgir Kjartansson, f. 15. 1. 1932, d. 3. 5. 1966, var aðstoðarlæknir við Kleppsspítalann, er hann lézt, og ætlaði hann sér að ljúka sérnámi í geðlækningum. Foreldrar hans, Jóna Ingvarsdóttir og Kjartan J. Jóhannsson héraðslæknir, gengust fyrir stofnun þessa minningarsjóðs um áramótin 1966—1967, og var tilkynnt um sjóðsstofnunina á aðalfundi Geðverndarfélags Íslands hinn 25. apríl 1967.

1. gr.

Sjóðurinn heitir Minningarsjóður Kjartans B. Kjartanssonar. Heimili hans og varnarþing er í Reykjavík.

2. gr.

Höfuðstóll sjóðsins er krónur 25 000.00 — tuttugu og fimm þúsund 00/100 krónur —.

3. gr.

Tilgangur sjóðsins er að veita námsstyrki til þeirra, sem leggja í framhaldsnám vegna geðverndarstarfa eða meðferðar geðsjúkra, svo sem lækna, hjúkr-unarkvenna, félagsráðgjafa, sálfræðinga og sjúkravinnukennara.

Sjóðsstjórn er heimilt að færa út og breyta starfssviði sjóðsins, ef ástæða þykir til.

4. gr.

Stjórn sjóðsins skipa: Kjartan J. Jóhannsson héraðslæknir, sem er formaður, meðan hann lifir, prófessorinn í geðlækningum við Háskóla Íslands, og einn maður, er stjórn Geðverndarfélags Íslands velur. Er Kjartan Jóhannsson fellur frá, skal landlæknir skipa formann sjóðsstjórnarinnar. Sjóðsstjórn skal annast úthlutun úr sjóðnum. Hún heldur gerðabók um sjóðinn, reikninga hans og annað, er varðar hag hans og starf.

5. gr.

Reikningsár sjóðsins er almanaksárið, og skal birta endurskoðaða reikninga sjóðsins í tímariti Geðverndarfélagsins. Endurskoðendur Geðverndarfélagsins endurskoða reikninga sjóðsins.

6. gr.

Tekjur sjóðsins skulu vera vextir af höfuðstól, gjafir og önnur tillög, sem sjóðnum kunna að berast. Skipulagsskrá sjóðsins má breyta með einróma samþykkt stjórnar hans.

7. gr.

Leita skal staðfestingar forseta Íslands á skipulagsskrá þessari.

Reykjavík, 4. apríl 1968.

Staðfesting forsetans á skipulagsskrá fyrir Minningarsjóð Guðbjargar Hafstað, útgefin á venjulegan hátt að mandatum af dómsmálaráðherra, 3. maí 1968.

Skipulagsskráin er þannig:

SKIPULAGSSKRÁ

fyrir Minningarsjóð Guðbjargar Hafstað.

1. gr.

Sjóðurinn heitir Minningarsjóður Guðbjargar Hafstað.

Heimili hans og varnarþing er að Varmalandi, Stafholtstungnahreppi, Mýrasýslu.

Sjóðurinn er stofnaður af skólasystur Guðbjargar Hafstað í Húsmæðrakennaraskóla Íslands, brautskráðum 1952.

Guðbjörg Hafstað var fædd 25. júní 1928 og lézt 3. júlí 1966.

2. gr.

Tilgangur sjóðsins er að kaupa listaverk handa Húsmæðraskólanum að Varmalandi.

3. gr.

Stofnfé sjóðsins er kr. 15 000.00 og má ekki skerða þann höfuðstól.

Tekjur sjóðsins eru minningargjafir og aðrar gjafir. Fé sjóðsins skal ávaxtað í sparisjóðsbókum og verðbréfum með ríkisábyrgð.

Reikningsár sjóðsins er almanaksárið.

Reikningarnir skulu endurskoðaðir á sama hátt og reikningar Húsmæðraskólans að Varmalandi.

4. gr.

Stjórn sjóðsins er skipuð þremur mönnum. Formaður stjórnar er skólastjóri Húsmæðraskólans að Varmalandi. Meðstjórnendur skulu valdir þannig, að skólasystur Guðbjargar Hafstað skiptast á að sitja í stjórninni eitt ár í senn eftir stafrófsröð, meðan þeirra nýtur við, en að því loknu skólastjóri Húsmæðrakennaraskóla Íslands, sem jafnframt hefur heimild til að skipa stjórnarmann í sinn stað. Hinn meðstjórandinn skal vera úr hópi systkina Guðbjargar Hafstað, valinn á sama hátt, og síðar úr hópi barna hennar, sem skiptast á að sitja í stjórninni, jafnóðum og þau verða fjárráða. Að því loknu skal formaður skólanefndar Húsmæðraskólans að Varmalandi skipa þetta sæti.